

ጳጳርሲ ፃፊዳ ናምዓንሉ ኪታ ጋሳ ቆፋ

ሃዋሪያ ጳጳርሲ ፃፊዳ ናምዓንሉ ኪታይ ፃፊቲዳይ፡ ዲማ ዲማ ቤሳን ዴዲያ ቢኒ አማኒያ አሳሳ። ሃ ኪታ አይፌ ቆፋይ፡ ዋርዶ አስታማሬታ ኢታ ኦሱዋኔ ኤንታ ተሚርቲያ ጋሶን ሜዴቲዳ ዩላያ ዴዑዋ ኢፃና ሜላሳ። ሄ ሜዴቲዳ ሜቶታ ዲጋናው ኦጌ ጊዳናይ፡ ዩሱሳ ባንታ አይፊያን ቤዲዳ አሳቲኔ ኢ ታማርሲያ ዋዴ ባንታ ሃይላን ሲዲዳ አሳቲ ታማርሲዳ ተሚርቲያ ባጋራ ያሳባኔ ጎዳ ዩሱስ ኪሪስቶሳባ አማንሉያ ኤራ ኦይካናይሳ። ፃፊይ ሚንሉዲ ኦዲዳይ፡ «ኪሪስቶሲ ናምዓንሉ ዩና» ያጊያ ዋርዶ ተሚርቲያባ። ሄ ቆፋ ሚንሉዲ ኦዲሼ፡ «ኪሪስቶሲ ሲሚዲ ዮና ጋምዲዳይ፡ አሳ ኡባይ ባ ናጋራፔ ሲማና ሜላፔ አቲን ኦኒካ ቆያና ሜላ ኮዮና ጊሾሳ» ያጌሰ።

2 ጳጳርሳ ኪታ አይፌ ቆፋታ

- ሳርሶ 1:1-2
- አማኒያ አሳ ፃሳ 1:3-21
- ዋርዶ አስታማሬታ 2:1-22
- ኪሪስቶሳ ናምዓንሉ ዩሳ 3:1-18

1 ዩሱስ ኪሪስቶሳ ሃዋሪይኔ ኢያ አይሌይ፡ ታኒ፡ ሲሞን ጳጳርሲ፡ ኑ ያሳኔ ኑና አሺያ ዩሱስ ኪሪስቶሳ ሂሎቴላ ባጋራ ኑይሳ ሜላ አልዖ አማኖ ኤኪዳይሳታሰ ሃ ዳብዳቢያ ፃፋሰ።

2 ያሳኔ ኑ ጎዳ ዩሱሳ ኤርን አዶ ኬሃቴላይኔ ሳርይ ሂንቴው ኩሞ።

ያሳ ፃሳኔ ደሩዋ

3 ባ ቦንቶኒኔ ሎዖቴላን ኑና ፃጊዳ ኢያ ኤርን ዴዖሲኔ ያሳ ዳኒዲ ደናው ኮሺያባ ኡባ ያሳይ ባ ዋልቃን ኑስ አሚሰ።

4 ሂንቴ ኢታ አሞ ጋሶን ሜዴቲያ ሃ አላሚያን ዴዲያ ባሻፌ ኬሲ ኤካናዳኔ ያሳ ያሳቴላን ሻኬታናዳ፡ ሃ አሞታታ ባጋራ ዳር አልዖኔ ጊታ ኡፋይሳ ኑስ አሚሰ።

5 ሄሳ ጊሾ፡ ሚኒዲ፡ ሂንቴ አማኑዋ ቦላ ሎዖቴላ፡ ሎዖቴላ ቦላ ኤራቴላ፡

6 ኤራቴላ ቦላ ባና ሃሮ፣ ባና ሃሮ ቦላ ገንጫ፣ ገንጫ ቦላ ያሳ ዳኖ፣

7 ያሳ ዳኖ ቦላ ኢሻቴላ ከሃቴላ፣ ኢሻቴላ ከሃቴላ ቦላ ሲቆ ጉጂቴ።

8 ሃይሳቲ ሂንቴው ዳሪዲ ዳዒያባ ገዲኮ፣ ጎዳ ዩሱስ ኪሪስቶሳ ኤሮን ማዲያ አሲኔ አይፌራ ዳዒያ አሲ ኦላና።

9 ሺን ሄሳቲ ባይና ኦኒካ ማታን ዳዒያባ ፃላላ ቤዒያ ቆቄ። ኢ ባ ካሴ ናጋራፔ ጌዩዳይሳ ደገሰ።

10 ሄሳ ገሸ፣ ታ ኢሻቶ፣ ሂንቴ ፃሳኔ ሂንቴ ደሩዋ ሚንላናው ካሴይሳፌ አሊዲ ሚኒቴ። ሂንቴ ሄሳታ ኦሊያባ ገዲኮ፣ ቋቤቴኬታ።

11 ሄሳን ኑ ጎዳኔ ኑና ኢሺያ ዩሱስ ኪሪስቶሳ ሜሪና ካዎቴላ ጌሊያ ኩሜላ ማታይ ሂንቴው ኢሜታና።

12 ሄሳ ገሸ፣ ሂንቴ ሃይሳታ ኤሪያባኔ ሄ ኦይኪዳ ቱማን ሚኒዲ ዳዒያባ ገዲኮካ፣ ታኒ ሃይሳታ ኡባ ዎዴ ሂንቴና ሃሳዩሶ ኣገኬ።

13 ታኒ ሸምፖራ ዳዒዳ ዎዴ ኡባን ሂንቴና ሃሳዩሳናይሲ ኮሺያባ ጋዳ ቆፓይሰ።

14 ኑ ጎዳ ዩሱስ ኪሪስቶሲ ታው ቆንጫሳዳይሳዳ ታኒ ሃ ሃይቂያ አሳቴላ ጋምዖና ቃራ ዩጋዳ ባናይሳ ኤራይሰ።

15 ታኒ ሂንቴፌ ሻኬቴኮካ ሂንቴ ሃይሳታ ኡባ ዎዴ ኣኬካና ሜላ ታው ዳንዳዔቴያባ ኡባ ኦላና።

16 ኦኒ ጎዳ ኪሪስቶሳ ዎልቃኔ ኢያ ዩሳባ ሂንቴው ኦዳይ፣ ኢያ ገታ ቦንቹዋ ቤዒዲፔ ኣቲን ሜቋ ኬሲዳ ሃይሴ ገዳና።

17 ዳሮ ዎልቃማ ቦንቹዋፌ፣ «ታኒ ኡፋይቴያ፣ ታ ደሲያ ናዓይ ሃይሳ» ያገያ ቃላይ ዩዳ ዎዴ ያሳ ኣዎፔ ቦንቹኔ ጋላታ ኤኪሰ።

18 ኦኒ ጌሻ ዳሪያ ቦላ ኢያራ ዳዒያ ዎዴ ሄ ቃላይ ሳሎፔ ዩሺን ሲዒዳ።

19 ኑሰ ሄሳፌ ኣቋያ ኣማኔቲዳ ቲንቢቴ ቃሊ ዳዔሰ። ሳዒ ዎንታና ጋካናወኔ ባካሊ ሂንቴ ዎዛናን ደላና ጋካናው፣ ቋማን ፖዒያ ፖዎ አሲ ናጌይሳዳ፣ ሂንቴ ሄ ቃላ ናገኮ ሎዎ ኦሌታ።

20 ኡባፌ ካሴቴዲ ሃይሳ ኤሪቴ። ጌሻ ማፃፋን ፃፌቲዳ ቲንቢቴ ቃላ ኦኒካ ባ ደሲዳዳ ቢርሻናው ዳንዳዔና።

21 ቲንቢቴ ኡባ፣ ያሳይ ኪቲዳ ኣሳቲ ጌሻ ኣያናይ ካሌሊን፣ ኦዲደሶናፔ ኣቲን ኣሳ ሸኔን ኦዲቦኮና።

2

ዎርዶ አስታማሪታ

1 ሺን ዎርዶ ናቤቲ ካሴ አሳ ጊደን ዴቤሳ ማላ ሃባካ ዎርዶ አስታማሪቲ ሂንቲ ጊደን ዴንዳና። ኤንቲ ባንታና ዎዚዳ፣ ጎዳ ካዲዲ፣ ጳይሲያ ዎርዶ ቲሚርቲያ ኤሃና። ሄሳን ኤንቲ ባንታ ቦላ ኤሌሲዲ ጳዮ ኤሆሶና።

2 ዳር አሳይ ዩላያ ኤንታ ኢታ ኦጊያ ካላና፤ ኤንታ ጋሶን ቱማ ኦጊይ ጫዬታና።

3 ዎርዶ አስታማሪቲ ሚሽ ያሪዲ ባንታው ሜቋ ኬሲዳ ሃይሴን ሂንቲና ቦንቃና። ቤኒፔ ዶሚዲ ኤንታ ፐርዳይ ጊሊ ኡቲሰ፤ ኤንታ ጳዮይካ ኤንታና ናጊ ኡቲሰ።

4 ናጋሪ ኦሲዳ ኪታንቸታሰ ያሳይ ቃጴቶና፣ ፐርዳ ጋላሰ ጋካናው ጋናሜ ቋማ ኦላን ኤንታ ቃቺ ዩጊሰ።

5 ሄሳዳካ፣ ያሳይ ዲሎቴላባ ኦዲያ ኖሄኔ ሃራ ላፑን አሳታ አሺዲ፣ ያሳ ጎይኖና አሳይ ዴዲያ ቤኒ አላሚያ ቃጴቶና ጳዮ ሃላን ጳይሲሰ።

6 ጌላታሰ ለሚሶ ጊዳና ማላ ያሳይ ሶዶሜኔ ጋሞራ ካታማታ ቢዶ ኦሲዲ ፀ-ጊዲ ጳይሲሰ።

7 ሂንሰ ከቲቶና ላይማቲያ አሳታ ጊደን ዎዩቲሽ ዴዲዳ ዲሎ ሎፀ ያሳይ አሺሰ።

8 ሄ ዲሎ አዴይ ኤንታ ጊደን ዴዲሽ፣ ኤንቲ ኦሲያ ኢታ ኦሰ-ዎ ጋላሰ ጋላሰ ቤዲዳ ዎዴኔ ሲዲዳ ዎዴ ኢያ ሎዎ ዎዛናይ ኤንዴቲሰ።

9 ሄሳ ጊዲኮ፣ ጎዳይ፣ ባና ጎይኒያ አሳታ ፓጩፔ ዎቲ አሻኔኮ፣ ቃሲ ናጋራንቸታ ፐርዳ ጋላሳሰ ጋካናው ዎቲዲ ሴሪሽ ናጊሳኔኮ ኤሪሰ።

10 ኡባፌ አሲዲ ቱና አሞን አሾ ቆፋ ካሌይሳታኔ ማታ አዎታ ካጴይሳታ፣ ፐርዳ ጋላሰ ጋካናው ጎዳይ ናጊሲሰ።

ሄ አሳቲ ጋንጃ ሚኖኔ ኦቶራንቸ ጊዲያ ጊሾ ሳሎ ሜጴቴላታ ጫዩሽ ያዮኮና።

11 ሺን ኪታንቸቲ ዎርዶ አስታማሪታፔ ዎልቃኒኔ ሚኖቴላን ዳር አጶሶናሺን ጎዳ ሲንላን ሳሎ ሜጴቴላታ ጫዮኮና።

12 ሺን ሄ አሳቲ ባንታ ኤርናባን ጌሊዲ ጫዮሶና። ኤንቲ ኦይኬታናውኔ ሃይቃናው ዩሌቲዳ፣ ዎዛኒ ባይና ዶዳ ማላ ሃኖሶና፤ ኤንቲካ ዎራ ዶዳዳ ጮ ጳያና።

2:5 ሜዴ 6:1-7:24 2:6 ሜዴ 19:24 2:7 ሜዴ 19:1-16

13 ኤንቲ ጋሊዳ ሜቱዋዳ ዛሪ ማቶታና። ሴታ ጋላስ ዩዊሽ ጉፔይሳ ኡፋይሲያ ባ ጊዲ ቆፖሶና። ኤንቲ ካዉሻታኔ ቱናታ ጊዲ ዴዊሽ ሂንቴራ ሻኬቲያ ሲቆ ኢማቱዋን ኡፋይተሶና።

14 ላይማቲያ ማጫሲ ዪሊዲ አጎና አይፌይ ኤንታው ዴዌሰ፤ ቃሲ ናጋራ ኦፊይሳ አጎኮና። አማኖን ሚኒቦና አሳ ጨሞሶና። ኤንታው ኡባ ዋዴ አሞቲያ ዋዛኒ ዴዌሰ፤ ኤንቲ ቃንጌቲዳይሳታ።

15 ኤንቲ ሱሬ ኦጌ አጊዲ፥ ማካላ ሚሽ ሲቁዲ ባሊዳ፥ ቢያራ ናዓ ባላማ ኦጊያ ካሊዶሶና።

16 ኢ ባ ናጋራ ጋሶን ሃንቄቲስ፤ ዶኒ ባይና ሃሬይ አሳዳ ሃሳዬዲ ናቢያ ጎሻቴላ ቴቁስ።

17 ሄ አሳቲ ማሊዳ ፑልቶታ ማላኔ ጫርኮይ ቶኪዲ ኤፊያ ሻራ ማላ፤ ኤንታ ናጌይ ሳካና ቋማ።

18 ኤንቲ ሃዳኔ ኦቶሮ ኦዳ ኦዴቲሽ ባላን ዴዊያ አሳ ጊዶፊ ኬሲ ኤኪዲ ቡሮ ሚኒቦና አሳታ ላይማቴላ አሻ አሞን ጨሚዲ ባሌሶሶና።

19 ኤንቲ ባንታው ጳዮ አይሌቴላን ዴዊሽ ሃራታኮ፥ «ሂንቴ አይሌቴላፊ ኬያና» ያጎሶና። አይስ ጊኮ፥ አሲ ባ ያኔቲዳባ ኡባስ አይሌ።

20 ኤንቲ አሺያ ኦ ጎዳ ዩሱስ ኪሪሰቶሳ ኤሪዲ ሃ አላሚያ ቱናቴላፊ ኬሲ ኤኪዳፔ ጉዬ፥ ዛሪ ቃዳቲዲ ያኔቲኮ ካሴ ዴዊያ ዳዑዋፔ ጉዬይሲ ኤንታው ኢታ ጊዳና።

21 ኤንቲ ያሎቴላ ኦጊያ ኤሪ ሲሚዲ አጌይሳፊ ኮይሮቲዲ ጌሻ ኪታ ኤርናኮ ኤንታው ሎዖሺን።

22 «ካኒ ባ ጮሻኮ ጉዬ ሲሚስ» ቃሲ፥ «ሜጬቴዳ ጉዲንሶይ ጉዬ ሲሚዲ ኡርቃን ጎንዶሬቴስ» ጊያ ለሚሶይ ቱማ ጊዴይሲ ኤንታ ቦላ ኦፊስ።

3

ጎዳይ ያና

1 ታ ሲቆ አሻቶ፥ ሃይሲ ታ ሂንቴው ፃፊዳ ዳብዳቤይ ናምዓንሎ። ታኒ ሃ ናምዑ ዳብዳቤታካ ሂንቴው ፃፊዳይ፥ ሂንቴ ሱሬ ቆፋ ቆፓናዳ ሂንቴና ዴንሌላናሳ።

2 ቃሲ ጌሻ ናቤቲ ቤኒ ኦዲዳ ቃላኔ ኦና አሺያ ጎዳይ፥ ሃዋሬታ ባጋራ ኪቲዳ ኪታ ሂንቴ ሃሳያና ማላ ኮያይሰ።

3 ኡባፌ ካሴቲዲ፡ ዎዴ ወርሴላን ባንታ አሙዋ ካሊዲ አሴ ቶቹይሳቲ፡ ቶቹሼ ያናይሳ ኤሪቴ።

4 ኤንቲ፡ «ታ ያና ጊዳይሲ አዉን ዴዒ? ኑ አዋቲ ሃይቂደሶና፡ ሺን ኡባባይ ሳዓይ ሜዴቶሳፕ ደሚዲ ዴዔይሳዳ ዴዔሰ» ያጎሶና።

5 ዳር ዎዴፕ ካሴ ሳሎይ ያሳ ቃላን ሜዴቲዳይሳ፤ ቃሲ ሳዓይ ሃላፊኔ ሃላን ሜዴቲዳይሳ ኤሪሼ ካደሶና።

6 ሄ ዎዴ ዴዒያ ሳዓይ ሃላን ሚቴቲዲ ጳይሰ።

7 ሺን ሃዒ ዴዒያ ሳሎይኔ ሳዓይ፡ ጌላቲ ፐርዴቲያ ጋላሳይኔ ጳያ ጋላሳይ ጋካናው ሄ ቃላን ታማሰ ናጌቲዲ ዴዎሶና።

8 ሺን ታ ሲቆ አሻቶ፡ ሃ ኢሲባ ደጎፕቴ። ጎዳ ማታን ኢሲ ጋላሲ ሙኩሉ ላይላ ሜላ ጊዴይሳኔ ሙኩሉ ላይላ ኢሲ ጋላሳ ሜላ ጊዴይሳ ደጎፕቴ።

9 ኢሶቲ ኢሶቲ ጋምዒሰ ጊዲ ቆፔይሳዳ፡ ጎዳይ ባ ኡፋይሳ ቃላ ጊሾ ጋምዔና። ሺን ኦኒካ ጳዮና ሜላ ኮዩዲ፡ ኡባይ ባንታ ናጋራፕ ሲማና ሜላ ሂንቴ ጊሾ ጊዲ ጌንጩሰ።

10 ሺን ጎዳ ጋላሳይ ካይሶዳ ያና። ሄ ጋላሳን ሳሎቲ ዎልቃማ ጉንላን ጳያና፤ ሳሎ ሜዴቲላቲ ታማን ፀጌታና፤ ሳዓይኔ ኢያ ቦላ ዴዒያ ኡባይ ጳያና።

11 ሂዛ፡ ኡባባይ ሄሳዳ ሃኒዳ ጳያባ ጊዲኮ ሂንቴ አይ ሜላ አሲ ጊዳናው ቤሲ? ሂንቴ ጌሺኔ ያሳ ዳኒያ ዴዎ ዳናው ቤሴሰ።

12 ሂንቴ ሲንላራ ያ ያሳ ጋላሳ ናጊሼ ሂንቴው ዳንዳዔቲያባ ኡባ ኦላዲ ሄ ጋላሳ ኤሶዩቴ። ሄ ጋላሰ ሳሎቲኔ ኢያን ዴዒያሳይ ታማን ፀጌታና፤ ዎልቃማ ሱላን ቲልዓና።

13 ሺን ኑኒ ዲሎቴላ ሃሪያ ኦራላ ሳሎኔ ኦራላ ሳዓ ያሳ ኡፋይሳ ቃላዳ ናጎሰ።

14 ሂሳ ጊሾ፡ ታ ሲቆ አሻቶ፡ ኑ ሄ ጋላሳ ናጊያ ጊሾ ፖኮይኔ ቦሬይ ባይናይሳታ ጊዲዲ፡ ጎዳራ ሳሮን ዳናው ሚኒቴ።

15 አሲ ኡባይ አታና ሜላ ኮዩዲ ጎዳይ ዳንዳዔይሳ ደጎፕቴ። ቃሲ ኑ ሲቆ አሻይ፡ ጳዉሎሲ፡ ያሳይ ኢያው ኢሚዳ ጨንጫቴላን ሄሳዳ ሂንቴው ፃፊሰ።

16 ኢ ባ ዳብዳቤታ ኡባን ሄሳታባ ፃፊሰ። ኢያ ዳብዳቤታ ጊደን አኬካናው ዎይሲያ ቆፋቲ ዴዎሶና። ታማሪቦናኔ ሚኒቦና

3:3 ዪሁ 18 3:5 ሜዴ 1:6-9 3:6 ሜዴ 7:11 3:8 ማከ 90:4
3:10 ማቶ 24:43፤ ሉቃ 12:39፤ 1ቴሴ 5:2፤ ዮቆ 16:15 3:13 ኢሳ 65:17፤
66:22፤ ዮቆ 21:1

አሳቲ ሃራ ያሳ ቃላ ሚርቄይሳዳ ሃ ኪታታካ ቆያናው ማቸዲ ሚርቆሶና።

17 ሄሳ ጊሾ፣ ታ ሲቆ ኢሻቶ፣ ሂንቴ ሄሳ ኤሪያ ጊሾ ማካላታ ባላን ጨሜቲዲ፣ ቆዮና ሜላኔ ሚኒዲ ዳዲያ ቤሳፌ ኩንዶና ሜላ ናጌቲቴ።

18 ሺን ሂንቴ ኑና አሺያ ኑ ጎዳ፣ ዩሱስ ኪሪስቶሳ አቶ ኬሃቴላኒኔ ኤራቴላን ዲጨቴ። ኢያው ሃዲካ ሜሪናዉካ ቦንቸይ ጊድ። አሚንዒ።

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source
files dated 29 Jan 2022

c35d6c73-3843-5482-b53e-7559d35deee5